

Hawfwen Bouxcuengh Bingzgoj

□ Maj Veiungz comz hoiz



▲ Canghfwen doiq fwen haenqhwd.

◀ Fwenleux doxdax yinx vunzlai humx yawj.



▲ Dahsau caemh sing eu fwenleux.



▲ Fwenvuengz son vunzlai eu fwenleux.



▲ Canghfwen ngoenzhoengq gag comz doiq fwen.

“Daengz Bingzgoj, ganj hawfwen, eu fwenleux, dingq yinhyoz!” Youq Guengsae, gij fungsug hawfwen Bouxcuengh Bingzgoj Yen ce ndaej ciei caezcienz. Bouxcuengh dieg haenx “yawj fwen lumj mingh, fouz fwen couh lumj ndawranz fouz miz youz gyu”. Daengx yienh gungh miz 20 lai aen hawfwen, ndawde Hawmoz、Hawyeh Daibingz Cin, Byamehnangz Majdouz Cin daengj banh ndaej haemq hoengh haemq nauhyied.

Hawfwen Bouxcuengh Bingzgoj lizsij gyaenanz, giekdaej gwnzbiengz cix naekna. Ciuheq Bouxcuengh liglaiz maij eu fwen, gyoengqde aeu fwen ma geiqcienz lizsij, cienzson gingniemh guh ndaem ciengx gvaq ndwenngoengz. Hawfwen daj gij cunghgyau hozdung ciuhnduj daeuj, nanz le couh baenz gvenq lo. Ciuq laizyouz ma baen, hawfwen Bingzgoj aiq ndaej baen guh sam cungj.

It dwg mbaenjgouz. Lumjbaenz hawfwen Hawmoz. Cienzgangj aengamj Hawmoz miz ndaek rin ndeu gig lumj duzmoz, liggaueq ndwensam coseiq, vunzlai couh bae baihnaj duzmozrin guh cai, gouz goengmbwn doek fwn, danghnaeuz duzmozrin miz singciuz, bide couh rumz dingh fwn yinz. Guh cai sat le lij banh hozdung ciengj bauqva、eu fwenleux daengj.

Ngeih dwg guh’angq caeueq ra youx, lumj hawfwen Byamehnangz. Cienznaeuz dahsien Mehnangz miz song dah lwgmbwk gaenxguh、gyaeundeit youh gig rox eu fwen. Liggaueq ndwencaet, maknim gwnz ndoi baenz mbaet lo, song cejnuengx couh hwnj ndoi bae, itmienh mbaet mak itmienh eu fwen. Singfwen cienz bae gig gyae, bouxcoz mbanj henzgyawj dingqnyi le couh youq ngoenz liggaueq ndwencaet cibseiq hwnj ndoi bae caeueq songde doiqfwen, eu le sam ngoenz sam hwnz sawhingz cungj mbouj dingh. Caezgya cungj fug songde, hoeng cix nyinhsaw. Ndwencieng youh daeuj caeueq songde doiqfwen, daj ndwencieng coit doiq daengz cosam caemh faen mbouj ok sawhingz. Byamehnangz bi

banh song baez hawfwen couh baenz gvenq lo, bienqbaenz giz bouxcoz dangdieg guhcaemz ra youx.

Sam dwg geiqniemh. Lumj Byamehnangz lij lingh miz aen cienznaeuz ndeu. Riuzgangj, dahsau Mehnangz caeueq daegmbauq Sam’ouj Lungzan guhyoux, ngoenz liggaueq ndwencaet cibseiq songde baenzgya, mboujliuh Byavaz bouxvunzrwix neix bae ciengj yah. Doeklaeng, Byavaz deng raemj gyaeuj, gyaeuj de bienqbaenz ndaek bya iq ndeu, Sam’ouj caemh deng Byavaz raemj gyaeuj, gyaeuj de deng dik daengz doiqhamq Dahyougyangh bae. Mehnangz raen neix couh bienqbaenz ndaek bya dog, henhoh youq gizde. Haenx couhdwg Byamehnangz seizeix, eiqsei dwg goengq byabawx. Mehnangz doiq cingzgyaez giendingh mbouj bienq, gyoengqvunz vih geiqniemh de couh youq dinbya Byamehnangz laeb daiz cuengqcaeq, doeklaeng youh bienqbaenz hawfwen, cienz nanz le couh baenz gvenq lo.

Hawfwen Bouxcuengh Bingzgoj caeueq gizyawz hawfwen Guengsae gak dieg ityiengh, ciepcienz hwngfat caeueq gyoebcomz langhbaj le cienздоengj vwnzva minzcu. Vih le haivat vwnzva hawfwen, fatyengz cienздоengj minzcu, Bingzgoj Yen daj bi 2008 hainduj banh cietyinhyoz hawfwen Bouxcuengh. Lumj bi 2010, cietyinhyoz miz fwenleux cienздоengj、fwenleux moq、doiqfwen、lwgnyez habciengq daengj, lij langhbaj le gij minzsug naengj haexnaengj、dub gyaeq dazsaek、baenzgya daengj; bi 2011 cix miz fouxnyenz Yauzcuz Denzlinz、Fwengujmeij Denzyangz、Heiqcuengh Nazlaur Sihlinz、fwen Bouxgun Lingzyinz、Hahleux yozdui ciengq go daengj, neiyungz yiengh lai yinxvunz.

Seizeix, hawfwen Bouxcuengh Bingzgoj gaenq bienqbaenz dangdieg aen binjbaiz vwnzva miz daegsaek Bouxcuengh. Fwenleux cix yungz haeuj saedceij gyoengqvunz bae, ciengq ok vunzlai maqmuengh ndwenngoengz gvaq ndaej ndei.